

东坡全集

第三函
十一册

東坡集卷之五十六

尺牘

眉山蘇軾東坡氏著

與朱康叔十九首

以下俱黃州

某啟武昌傳到手教繼辱專使陞簡感服併深比日尊體佳勝節
物清和江山秀美府事整辦日有勝遊恨不得陪從耳雙壺珍貺
一洗旅愁甚幸甚佳果收藏有法可愛可愛拙疾乍到不諳風
土所致今已復常矣子由尚未到真寸步千里也未由展奉尚冀
以時自重

令子歸侍左右日有庭闈之樂恨未際見不敢輒奉書近見提舉
司薦章稍慰輿議可喜可喜作墨竹人近爲少閒暇俟宛轉求得
常續致之呵呵酒極醇美必是故人特遣下廳也某再拜

三

某啟專使至復領手教契愛愈厚可量感服仍審比日起居休勝
爲慰舍弟已部賤累到此平安皆出餘庇不煩念及珍惠雙壺遂
與子由屢醉公之德也隆暑萬萬以時自重行膺殊用人還上謝

四

某再拜近奉書并舍弟書想必達胡掾至領手教具審起居佳勝

兼承以舍弟及賤累至特有厚貺羊麪酒果一捧領訖但有慚忤
舍弟離此數日來教尋附洪州遞與之

五

已遷居江上臨臯亭甚清曠風晨月夕杖履野步酌江水飲之皆
公恩死之餘波想味風義以慰孤寂尋得去年六月所寫詩一軸
寄去以爲一笑酷暑萬乞保練

六

某啟暑毒不可過百事墮廢稍疎上問想不深訝比日伏想尊履
佳勝別乘過郡承賜教及惠新酒到此如新出甕極爲珍奇感愧

不可言因與二三佳士會飲同感德也秋熱更望保練行膺峻陟

七

胡掾與語如公之言佳士佳士渠方寄家齊安時得與之相見也
令子必且盤桓侍下中前示諭姻親事可留示年月日恐求親者
欲知之造次造次

八

某啟因循稍疎上問不審近日尊候何如某蒙庇如昨秋色益佳
郡事稀少有以爲樂耶無緣展奉但積思仰乍冷萬冀以時自重
郭寺丞一書乞指揮送與其人甚有文雅必蒙青顧也聞其墜馬

傷手不至甚乎

九

某啟近附黃岡縣通拜書必達專人過此領手教具審起居佳勝
勿復淒冷此歲行盡會合何時以增悵然唯祈善保

十

敷文宅計此月末方離陳南河淺澀想五六月間方到此荷公憂
恤之深其家固貧甚然鄉中亦有一小莊子且隨分過也歸老之
說恐未能如雅志又修理積弊已就倫次監司朝廷豈有遽令放
閑耶問及物食天漸熱難久停恐空煩費也海味亦不若食既忝

雅契自當一一奉白

十一

示諭親事專在下懷然此中殊少士族若有所得當立上聞也要
字俟少閑續上納墨竹如可尊意當取次致左右畫者在此不遠
必可求也

十二

某啟近王察推至辱書承起居佳勝方欲裁謝又柱教墨益增感
愧數日來偶傷風百事皆廢今日微減尙未有力區區之懷未能
詳盡也乍暄惟冀以時珍攝稍健當上問次

十三

閣名久思未獲佳者更乞詳示閣之所向及側近故事迹爲幸
董義夫相聚多日甚歡未嘗一日不談公美也舊好誦陶潛歸去
來常患其不入音律近輒微加增損作般涉調哨遍雖微改其詞
而不改其意請以文選及本傳考之方知字字皆非創入也謹作
小楷一本寄上却求爲書拋磚之謂也亦請錄一本與郭元弼爲
病勸不及別作書也數日前飲醉後作頑石亂篠一紙私甚惜之
念公篤好故以奉獻幸檢至

十四

令子必在左右計安勝不敢奉書舍弟已到官聞筠州大水城內
丈餘不知虛的也屏贊硯銘無用之物公好事之過不敢不寫裝
成迭去乞一覽少事不免上千聞有潘原秀才以買樸事被禁某
與其兄潘丙解元至熟最有文行原亦是佳士有舉業望賜全庇
暑月得早出爲此人父母皆篤老聞之憂恐萬端公以孝義各世
必能哀之恃舊干瀆不敢逃罪

天覺出藍之作本以爲公家寶而公乃輕以與人謹收藏以鎮篋
笥然尋常不揆輒以亂道塵獻想公亦隨手將與人耳呵呵

與可船旦夕到此爲之泫然想公亦爾也予出到此須留他住五
七日恐知之前曾錄國史補一紙不知到否因書畧示諭蒙寄惠
生煮酒四器正濟所乏極爲珍感生酒暑中不易調停極佳然閔
仲叔不以口腹累人某每蒙公眷念遠致珍物勞人重費豈不肖
所安耶所問菱翠至今虛位雲乃權祿遣耳何足掛齒牙呵呵馮
君方想如所諭極煩留念又蒙傳示秘訣何以當此寒月得暇當
試之天覺亦不得書此君信意簡率乃其常態未可以疎數爲厚
薄也酒法是用菘豆爲麪者耶亦曾見說來不曾錄得方如果佳
錄示爲幸

十六

見元章書中言當世之兄馮君處有一草伏朱砂法甚奇惟康叔
可以得之不知曾得未若果得不知能見傳否想於不肖不惜也

十七

今日偶讀國史見杜羔一事頗與公相類嗟嘆不足故書以奉寄
然幸勿示人恐有嫌者江令乃爾深可罪然猶望公憐其才短不
逮而已屢有干瀆蒙不恠幸甚幸甚其令章憲今日恐到此知之
杜羔有至性其父河北一尉而卒母非嫡經亂不知所之會堂
兄兼爲澤潞判官嘗鞫獄於私第有老婦辯對見羔出入竊語

人曰此少年狀類吾夫訊之乃羔母也自此迎侍而歸又往訪先人之墓邑中故老已盡不知所在館於佛寺日夜悲泣忽視屋柱煤烟之下見數行字拂而視之乃云遺迹云我子孫若求吾墓當於某村家問之羔哭而往果有老父年八十餘指其丘隴因得歸塋羔官至工部尚書致仕此出唐李肇國史補近偶觀書嘆其事頗與朱康叔相似因書以遺之元豐三年九月二

十五日記

十八

近日隨例紛冗有疎上問不審起居何如兩日來武昌如聞公在

告何也豈尊候小不佳乎無由躬問左右但有馳系冬深寒澀尤
宜慎護

十九

童質夫求琵琶詞不敢不寄呈安行言有一旣濟鼎樣在公處
若鑄造時幸亦見爲作一枚不用甚大者不罪不罪前日人還曾
附古木叢竹兩紙必已到今已寫得經藏碑附上令子推官侍下
計安勝何時赴任未敢拜書也

荅李康年一首

向承寵訪教語甚厚因循未及裁謝復枉專使辱書累幅意愈勤

重日獲所著通言三篇及新詩碑刻廢學之人徒知愛其文之工
妙而不能究極其意之所至欽味反覆不能釋手幸甚幸甚比日
起居何如竊想著書講道馳騁百氏而游於藝學有以自娛忘其
窮約也通言畧獲披味所發明者多矣謹且借留得爲窺觀他書
豈敢輒留他日別爲小字寫草書見惠不必心經乃大賜也要跋
尾謾寫數字不稱妙筆

荅虔倅俞括一首

軾頓首資深使君閣下前日辱訪寵示長牋及詩文一篇伏讀數
日廢卷拊掌有起予之歎孔子曰辭達而已矣物固有是理患不

知知之患不能達之於口與手所謂文者能達是而已文人之盛
莫如近世然私所敬慕者獨陸宣公一人家有公奏議善本頃侍
講讀嘗繕寫進御區區之忠自謂庶幾於孟軻之敬主且欲推此
學於天下使家藏此方人挾此藥以待世之病者豈非仁人君子
之至情也哉今觀所示議論自東漢以下十篇皆欲酌古以馭今
有意於濟世之用而不志於耳目之觀美此正平生所望於朋友
與凡學道之君子也然去歲在都下見一醫工頗藝而窮慨然謂
僕曰人所以服藥端爲病耳若欲以適口則莫如芻豢何以藥爲
今孫氏劉氏皆以藥顯孫氏期於治病不擇甘苦而劉氏專務適

口病者宜安所去取而劉氏富倍孫氏此何理也使君斯文未必
售於世然售不售豈吾儕所當挂口哉聊以發一笑耳進宣公奏
議有一表輒錄呈不須示人也餘俟面謝不宣

荅范景山一首

自離東武不復拜書疎忘之罪宜獲譴於左右矣兩辱手教存撫
愈厚感愧不可言卽日起居住勝知局事勞冗殊甚景山雖去軒
冕避津要所欲閒耳而不可得乃知吾道艱難之際仁人君子捨
衆人所棄猶不可得然憂喜勞逸無非命者出辦此身與之浮沉
則亦安往而不適也軾始到彭城幸甚無事而河水一至遂有爲

魚之憂近日雖已減耗而來歲之患方未可知法令周密公私墮
乏舉動尤難直俟逐去耳久不聞餘論頌鄙無所鑄發恐遂沮沒於
流俗矣子由在南都亦多苦事近詩一軸拜呈冗迫無佳意思但
堪公笑耳近齋居內觀於養生術似有所得子由尤爲造入景山
有異書秘訣倘可見教乎餘非面莫盡惟乞萬萬自重

與陸固朝奉一首

杭倅

某啟久留屬疾不敢造請負愧已深茲者啟行又不往別悚忤之
至謹奉手啟代達

與李無悔一首